

Atham woIoutha Atham ammakka oIoutha pokurrot Lon lonothon

Atham enni ionu lon lotte wokat waIoutha akkokurrot okkwi ipokat nti iapang poIeccuo. Kwokurrot atham enni akkwokurrinet ul w'rek iocckothe lon loIeccuo iocikittakotho lon ima nul iangkene ngkarra. Ul iangkene enni wokat angkene ul thoporot thoKapik iocckothe lon loIeccuo itti wikkoik ngkathar kolon ilokithak appinappin. OIoutha pongkenet nthokkwie lon kuru ncik thoppot nti iatham wolon loKapik woma'rot akwittarot ul iocckothe lon loIeccuo anekket mikit nolon ilaik icat loKapik ana nolon iloporot loIeccuo ammakka okin thoc-cikotho noul wothothilettat woIeccuo.

¹ Lon elli naun oun oIoutha pul iparekine oIeccuo oMiccie ana oun opang poIakup ana laine okkwion itha Kapik opappa pakkarat ana kongothekin ana itha oIeccuo po'rumot nan. ² Athiak thung ana thomicco ana thongat thung oka nanon arttakot nan.

³ Pangkingon, loporot kannan itti mpakurrinenon lon lotho'rettat itharon thaik tit aththut, anaruk mpokathat itti mpakurrinenon anomereket non itti onon throt nothocckot lon loKapik nocikit ila Kapik kethet ul wung ca'ri culukku ana p'rin thupuththuput. ⁴ Akka ul w'rek wonyarikotho ianon ana okin tholon ilokithak, okin thongotho itti okin thaprtto thoporot thoKapik llon len lotha'ro nul nuthuk ana ocukkwo nolon lolli wonnon ilulukku oIeccuo oMiccie. Anaruk thattatta then thonekkettanthen kin cik nci ma'rot.

⁵ Ana antoka manna itti onon thina lon elli papenang, anaruk mpongotho itti onon thakwarikot tat akka Ili

wo'rethe ul wung nti ithiak noththok poMuccir ana kongwathe okkwion ithakonnocokot lon lung. ⁶ Ana u'rupa wothothilettat woKapik wokat cik woppot iaKapik kethet pu'ran tothi'rot. Anaruk wakanna'rungkat nan itti wakkma mpu'ran pen. U'rupa woththekathe noka'ran ikaKapik kethet kin itti okin thikkoik nan tothi'rot. Ittina Kapik ki'rikikkot u'rupa wothothilettat nynyol thupuththuput i'rïmak nyothothirïn. Wikkoik than aca'ri akkakat ica Kapik athakkma kin nan. ⁷ Ana cakuruk ton okorronno ure nopothok poCothum ana poKamura ana a'ran iaik iccik ken iokat winako nan nth'a'ro nul nuthuk ana manna tha'ro nul ngkathar ika Kapik k'rat. A'ran enni wokat wok'rettat nthik ana wakeneron tat akka athik athok're ul iokkothe lon lokithak.

⁸ Ana ammakka menik, ul enni wonu lon len ima ilakorronno kin akin okkot lon lokithak noka ken, okin tharekke pu'ran poKapik ana ocungko thrik thoKapik tothi'rot. ⁹ Anaruk manna oMikail ili wou'rupa wothothilettat woKapik wakinni'ret pul pothopulut lon ilokithak ca'ri icakin tha'rettothe nokumi koMucca pul pothernte lon loKapik akka kwiot. Anaruk kwi'rethe pul pothopulut itti aKapik akkmang. ¹⁰ Anaruk ul enrïk wakkot ngure ana attatta a'rupu iakin thomma. Ittina okin thakitto ka ken nthokkot ngure ana attatta u'rupu. Anaruk Kapik kakkma kin. ¹¹ Angkre, nakin okin ithongothe itti okin thamakot kathar koKkain ipokkwothe opang. Okin thokat cik akin ammikkot othakka itti akin iot akucci ammakka oPalaam pokkettethe. Kapik kangwo ammakka kokkwothe oKkoro akka kw'rat ngili iaKapik kethet oMucca.* ¹² Okin thkikoik ere mothok imurttukot ncik imamukkietto. Amma onon tha'rantakothe itti onon tha'rko thu'rit

* 1:11 1.11 Na Akkain okatha Atham wothoku're ncik Ku'rathal 4.3-8 ana na Apalaam okatha Atham wo Maun ku'rathal 21.1-35 ana na Akkura okatha Atham wo Maun ku'rathal 16.1-35.

thorothun thothongarot nathtut, nthella ethia noka, anaruk okin thathikkie cuththun cokithak nthokkot lon ilokithak ilapiriekin noka ana ilakonnopirie non noka. Okin thungkot nuththe inella ng'ririt nakanang ittet nakkongothe. Okin thungkot kira ikakannokwono nyukul thothuput inyakin thonu itti nthakwono nan, ika apingon ithot cik akillekat kirrkkir. ¹³ Okin thungkot thopangka thorok irapangka irokwekothe amma arorret ngar ithi'rot ngothua ka thung. Okin thungkot mothot morithi'rot immaik maine ngi'rïmak ngothupuththuput.

¹⁴ Anuk ipe're'rapuruk nothiki thAtham perethe ul enni akwi'rekat itti, “Kapik kaik kanthan nul wung wop-pot iupupure ¹⁵ waththonce'ret lon loul cik appik ana attatta ul wolon ilokithak appik nti ilon ilokithak len ilakin thokkothe ana lon ilakin therethe Kapik ngngin ilokithak.”

¹⁶ Okin thokat akin erekot ana a'rettakot ana okin omakot lon ilokithak ilakin thongothe ana okin omereket ka ken ana uwet ul iakin thongothe itti akin ipittot kin a'rupu iakin thongothe.

¹⁷ Pangkingon itha ampongothe nokwarttikot lon ilaul wothothilettat wollu wonnon oleccuo oMiccie wi'rethe non ma'rot. ¹⁸ Okin thi'rethe non itti, “Noca'ri icanthan icacothot, ul w'rek wathokkot ngure nanon ana akin omakot lon len ilokithak ilaKapik k'rat.” ¹⁹ Okin then akkillillo ianon ana okin thakkot lon ere a'rupu worua iannokwarttikot cik, okin thella Kanang ikupure koKapik noka ken. ²⁰ Anaruk pangkingon no'rungkot ithocokot tholon lon loKapik nomikit mon ithupupure ana anna'ra nga'rama mpu'ran poKanang ikupupure. ²¹ Nangwot ka kon ithongarot thoKapik anno'rikot thoporot ithalli wonnon oleccuo oMiccie onane non ana ethet ton thikkoik thothupuththuput.

²² Onittarot okkwion ithonu mikiit me'ra ilon loKapik,
²³ No'ret opilingon ana okkiekin cik nti ithik nipo thiak
thopilingon nthothiaik anaruk n'ra eret wen iothontot
lon ilokithak len lokithak.

²⁴ Nopirane Kapik noka ook ipangwot ka kon nti ithapot
ilon ilokithak ana ipanekket non tokit kung nthopira noka
anon ella lon ilokithak noka anopirakat noka. ²⁵ Thrik ana
pu'ran ana ngili thaka thuluk thoKapik konnon ikulukku
kotho'ret thon oIeccuo oMiccie Ili wonnon nci ma'rot ana
inenni ana thupuththuput. Amin.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243faegee